



Kamis, 07 Juli 2022
Ogen: Masmur 133:1-3



Sada Perarih



Lit sada syair lagu singataken "Moria arus kap mejingkat, ertoto ras pe erdahin...". lagu enda nuriken kegeluhen Moria si mejingkat. Mejingkat bas erdahin, bage pe bas erkiniteken. Bas sie me Moria erusaha guna makeken waktu alu payo bage pe erkualitas. Waktu sierkualitas enda pe arusna ipakeken guna mpersada entah mperdeher kita ras sangkep geluh. Sangkep geluh e me jabu si bereken Dibata man banta guna banci radu ras sikelengen ras sihamaten. Kita enggo sitandai kerina ise kin sangkep geluhta, si jadi perenungenta wari enda uga dage anak-anakta nandai sangkep geluh e. Enda jadi tanggung jabapta, mpetandaken dinging mpersada anak-anakta ras sangkep geluh. Ula min sempat anak-anakta lanai tandaina apai biak mamana, mamina, bibina, bengkilana, turangna, impalna entah turang impalna ras sidebanna. Adi siperdiateken kegeluhen sigenduari anak-anak enggo buen tedehen atena HP na asangken keluarga. La ngasup sirang ras HP, piah dungna lanai lit sitedehen ras sangkep geluh. Bas paksa liburen enda e me sada paksa sigunaken guna mabai ia ku keluarga entahpe sangkep geluh. Pengarapenta arah si e mpeturah orat geluh si payo selaku anak-anak sierkeleng ate nandangi budaya ras peradatennta. Mehuli kel adi siaturken waktu guna si e aminna pe mbue kesibukenta, mejingkatlah petandaken anak-anakta ndahi keluarga. Arapenta turah me atena keleng nandangi sangkep geluh e seh maka biak mehamat erkalimbubu, medes ersenina, metami man anak beru e tersuanken bas geluh anak-anakta. Kitab Masmur 133 nuriken maka mehuli dinging senang kel adi ersenina sada perarih. Sada perarih erbahanca merim dinging mehaga keggeluhen enda. I tengah-tengah jabu si sada perarih me padan Tuhan guna nehken pasu-pasuNa. Pasu-pasu e jadi sada perayaken geluh kap. Tentuna arah kata enda ibabai kita segelah sikelengen ra sitedehen.